

福建通志

卷伍拾玖册
共壹百册

福建列傳卷六

宋三

陸廣字彥博侯官人曾祖景遷仕吳越官檢校太傅祖崇辰威武軍觀察
推官從錢氏歸朝官至殿中丞歷知瀘道潮廣四州父中和早卒母常以
子幼不克起家爲憂廣與弟廙泣涕發憤天聖二年廣登進士第初爲邵
武軍錄事改監徐州酒稅知尉氏縣移邛州以母老丐近就養得監泉州
商稅母喪服除知導江縣歲凶穀貴廣不待報發公田粟賑之盜屠民家
尉以囚來囚自言實盜廣釋之尉力爭之不聽眾莫悟廣意已而果獲真
盜江邊有浦曰離堆豪右擅焉廣詘其專修濬堰渠灌田萬有七千餘頃
自是無旱憂未幾選爲御史臺主簿詔行冬狩大講戎兵廣作箴以獻大
意逆戒荒萌仁宗嘉祐之除集賢校理出知婺州逾年改知泉州廣源州
蠻儂智高叛廣馳驛奏上方略稱旨召爲三司判官俄除景東提點刑獄
諷囚於齊至鄆州病卒子三人長倩登嘉祐二年進士終朝請大夫長緒

以蔭授郊社齋郎長愈字季謙登熙寧三年進士知崇德縣兼州學教授
會詔追封孟軻爲鄒國公長愈上言每歲春秋釋奠先聖文宣王以充國
公顏子配享乞並以充鄒二公配享下太常議眾謂孟子視孔子爲異代
難並配禮部侍郎林希奏配享及從祀但取道德有以相成者不必皆用
同時之人乃從長愈議終宣州簽事判官

王臨川文集
道光舊志

虞字彥恭廣弟幼就學置書數千卷閉門誦之不休累舉進士與廷試慶
曆二年特奏名官至泉州兵馬監押薦爲饒州鑄錢監未行疾卒子二長
憲元次長賓蔡州司理叅軍女一適起居舍人知諫院陳襄

憲元字道祖未數歲通習羣書十七歲來京師從黃晞治易春秋晞畏其
才不敢以弟子處之爲文章落筆數千言辭理典奧難讀累舉進士不第
既而歎曰丈夫不得已干祿養烏用犛牛以捕鼠哉稍稍習爲聲律其辭
務精麗明白嘉祐二年賜進士出身爲陳州司戶叅軍再調開封府祥符
縣主簿大臣有以論議時事雅有器識欲置之文字職者遽卒

以上古靈
先生文集

曾公亮字明仲晉江人父會端拱二年進士第二人授光祿寺丞直史館以親老丐補郡遷殿中丞知宣州大中祥符末由三司判官出爲兩浙轉運使丁謂興錢塘捍江之役發卒萬餘斬木伐石傾蕩山谷會時已解漕職奏列其狀有旨中罷會歷典七郡終刑部郎中集賢殿修撰知明州公亮以父蔭授大理評事天聖二年登進士第知越州會稽縣鏡湖常水溢爲民田患公亮立陡門泄水入曹娥江田獲利而父會稍買爲產公亮坐是謫監湖州酒稅慶曆七年入爲國子監直講集賢校理修起居注累擢天章閣待制兼侍講賜三品服故事待制入謝未始賜服至是仁宗御邇英閣講孝經面諭之曰朕卽講席賜卿所以尊寵儒臣也一日仁宗召執政侍從策訪政事會公亮以母病在告仁宗手詔遣內侍就問公亮條六事以獻略言完堡柵蓄兵馬使主兵者久於其任則夷狄不敢窺邊取之得其要任之盡其材則將帥不患無人損冗兵汰濫官則財用足省徭役專任農則耕者勸復陳宿衛之失及聽言知人之難皆取當時所急而便

於施行者仁宗嘉納之遂知制誥兼史館修撰皇祐三年拜翰林學士管
句三班院三班吏非賅謝不行抱文書升堂取判者高下在口公亮盡取
前後條目置坐側案以從事吏束手無能爲除端明殿學士知鄭州盜悉
竄他境夜戶不閉鄭人號爲曾開門有使客亡橐中物移文詰盜公亮報
曰吾境不藏盜殆從者之虞也索之果然嘉祐元年擢給事中叅知政事
三年加檢校太傅禮部侍郎五年依前官除樞密副使兼羣牧制置使更
制圖籍以周知四方兵數多少三路屯聚眾寡六年行吏部侍郎拜同中
書門下平章事集賢殿大學士公亮明練文法習知朝廷臺閣典憲首相
韓琦多咨訪焉每得四方奏獄必躬閱之密州奏盜有發民田銀砂者大
理當以強論死公亮曰此禁物也取之雖強與盜物民家有閒矣固爭之
下有司議比竊禁物法得不死著爲例契丹縱人漁界河又疏通鹽舟吏
恐生事不敢校公亮言萌芽不禁後將奈何遣雄州趙滋諭以旨意邊患
遂息時仁宗春秋高琦請建儲副與公亮共定大議英宗卽位加中書侍

耶兼禮部尙書治平元年慈聖還政遷戶部尙書四年正月遼賀正使在館故事賜宴紫宸殿會英宗不豫命公亮就館宴之使者不肯赴公亮責之曰賜宴不赴是不虔君命也人主有疾而必使親臨處之安乎使者乃就席神宗之立公亮卽英宗卧内奉詔旣而除行門下侍郎兼吏部尙書封英國公尋加尙書左僕射改封兗國公熙寧二年加昭文館大學士進封魯國公初公亮力薦王安石文學器業宜膺大用及安石爲衆知政事置條例司更張舊法公亮知神宗嚮用安石嘗使子孝寬參其謀然亦陽持正論以示若不與之同者安石至厲聲與之往返由是言者亦以安石爲專而公亮不與也蘇軾嘗從容責公亮不能救正朝廷公亮曰上與安石如一人此乃天也三年八月御史知雜事謝景溫因劾龍圖閣直學士張揆年老不退以警公亮猶未決踰月神宗御集英殿冊進士移寓需雲閣便坐延輔臣賜茶公亮陟降殿陛仆於地神宗命左右掖起之明日引疾求罷拜司空檢校大師兼侍中領河陽三城節度使集禧觀使仍五日

一奉朝請四年起判永興軍先是慶州卒叛已伏誅而餘黨散逸自陝以西皆警備公亮曰叛者誅矣胡乃張皇若是次第奏罷之長安豪右造飛語聲言營卒怨減削謀以元夜結外寇爲亂民大恐公亮率賓佐張燈置酒縱觀城市竟夕而歸飛語遂息神宗聞之謂安石曰大臣如公亮極不可得也會公亮乞還闕許之明年除守太傅致仕元豐元年卒年八十神宗臨哭輟朝三日贈太師中書令配享英宗廟廷謚宣靖及葬恩禮視韓琦御篆其碑首曰兩朝顧命定策亞勳之碑神宗嘗語輔臣曰公亮謹重周密內外無閒受遺輔政有始有卒可方漢張安世然陰助安石排富弼韓琦爲世所譏御史中丞呂誨引章辟光離閒岐嘉二王之言以攻安石誨坐罷出知鄧州知制誥蘇頌當制公亮召頌諭曰辟光治平四年上書介甫猶在金陵安得而教之頌遂據以命詞然辟光治平四年所上乃言他事非論二王也制出土大夫頗以爲非頌深悔之嘗謂人曰介甫雖黜逐我我怨之不若魯公之深也始尙書省議謚公亮忠獻禮官劉摯駁曰

丞相位歷三朝不聞拔一士安得謂之忠家累萬金未嘗濟一物安得謂之獻眾不能奪其議乃改宣靖云子孝寬孝宗孝純

孝寬字令綽

東都事畧作公綽

陰授將作監主簿歷知咸平縣民詣府訴雨傷麥

府以妄杖之孝寬躬行田辨其實得蠲賦熙寧初除判登聞鼓院言者彈奏大臣子弟不宜居要職公亮亦自陳乞閒慢局務乃令監皮角場三年詔曾公亮諸子依韓琦例推恩除孝寬祕閣校理提點開封府界諸縣鎮事時方行保甲法鄉民驚擾多自傷殘以避團練孝寬出榜募告扇惑者民由是不敢訴累除起居舍人充史館修撰兼樞密院都承旨承旨用文臣兼領自孝寬始未幾奉命察訪河東路義勇利害孝寬根括河外荒地七百餘頃以招弓箭手還朝拜龍圖閣待制同領羣牧使六年出爲河北路察訪使初孝寬建議廢八監以牧田賦民募耕增課馬政漸弛至是復請於河北行戶馬法令坊郭第三等鄉村第二等每戶養被甲馬一匹在府界免輸糧草二百五十束在五路歲免折變綠納錢詔從其請然自新

法行百姓困於科斂率爭領戶馬以免徭役其後馬斃賠償有司務爲苛
迫民益不勝其擾矣八年擢龍圖閣直學士契丹遣使爭代北地神宗遣
孝寬往河東分畫地界孝寬以圖籍按視而並邊未嘗侵北境乃奏曰國
家所以待外國者恩與信也恩不可使濫信不可使失苟細事不較將有
大於此者宜如故便十二月拜樞密直學士同簽書樞密院事丁父憂服
闋除端明殿學士知河陽府三年四月入朝留判司農寺九月出知陳州
四年改知秦州會王師討西夏議者欲徙秦鳳兵屬熙河孝寬言州直邊
衝兵不可徙從之未幾徙知鄆州鄆有孟子廟而無封爵孝寬請於朝得
封鄆國公配享孔子廟六年召爲吏部尙書八年除資政殿學士知潁昌
府元祐五年六月復召爲吏部尙書八月卒於道贈右光祿大夫孝宗官
至比部員外郎

孝純蔭補奉議郎官至殿中丞及公亮卒賜同進士出身孝純力辭出身
乞將所得恩官其族人之未仕者凡二十四年不改秩紹聖初曾布以爲

言哲宗瞿然曰殊不知公亮尙有子累遷至右贊善大夫終光祿少卿上

東都事畧閩書道光舊志

吳育字春卿建安人父待問字子禮咸平三年進士歷擢光祿寺卿以禮部侍郎致仕贈太保育天聖五年登進士甲科除大理評事遷寺丞知襄城縣宗室多葬其地以中貴人典護民患其擾育請所須皆從官給費省民便宦官或夜叩縣門索牛車育輒拒之宗子縱獵每以鷹犬暴民田入襄城境則相戒毋犯景祐元年應材識兼茂明於體用科策試入三等前此未有也擢著作郎直集賢院通判蘇州還知太常禮院言禮文殘闕願詔諸儒裁定乃詔修禮書故事尙書省集議在朝則先職入省則先官官卑而職高者嘗託事不至育請使異席不相壓眾議是之寶元初改右正言歷三司鹽鐵二判官尋以本官供諫職趙元昊僭號張士遜爲相議發兵討之育建言元昊雖稱藩乃夷狄服畔不常宜度外置之或援國初江南故事因之賜號彼得其欲當不妄動然後陰勅邊臣密修戰備則彼雖

有異志不能爲深害因備陳漢唐馭戎之術並錄上眞宗時方銳意於必討疏入士遜大笑曰人言吳正言患心風果然其後師久無功大將劉平石元孫任福等戰沒卒封元昊爲夏國王慶曆元年擢起居舍人進翰林學士累遷禮部郎中契丹與元昊構兵元昊求納款契丹請勿納朝廷未知所答育疏言二蕃自鬪鬪久不解可觀形勢乘機立功今先使人諭元昊契丹汝世姻一旦自絕力屈求我我所疑也若無他者當順契丹如故然後許汝歸歟告契丹已詔元昊如能投附轅門卽聽內附否當爲討之如此則彼皆不能歸咎於我矣於是出契丹書令兩制同對不易育議尋知開封府居數日發大奸吏一流嶺外又得巨盜積賊萬餘緡獄具而輒再變眾疑其冤天子遣他吏察之卒伏法慶曆五年拜右諫議大夫樞密副使改叅知政事山東盜起中使某視還奏盜不足慮兗州杜衍鄆州富弼山東人極尊愛之此則可憂仁宗欲徙二人育曰盜誠無足慮小人

以傾大臣非國家之福事遂寢章懿太后升祔眞宗廟言者請覃恩

給賞育以無事而啟僥倖力諫止既而仁宗語輔臣曰外人甚怨執政宜
慎之育曰臣既以身許國何憚此耶向綬知永靜軍爲不法疑通判江中
立發其覆中以危法中立自經死大臣以綬宰相子欲傳輕法育力持之
卒減死一等流南方御史唐詢請罷制科育奏疏駁議並言詢挾邪蠹國
請予案劾以明國法先是唐詢與宰相賈昌朝有親嫌育數言詢用故事
當罷詢怨育奏言自古災異乃冊賢良今者六科不用公卿推引率與進
士同時臣以爲習扇澆浮莫甚於此請悉罷之育由制科進詢力肆詆意
在育也仁宗刊其名付中書育奏駁歷舉漢唐制科不專爲災異而設且
言俟災譴然後詔舉尤不可者有三一則使天下材俊淹滯之士待災異
而進非所以養恥也二則平居不詢造形乃問非所以懼災也三則輕改
信令示天下無渴士之心非所以廣賢路也仁宗是育言不復下兩制詔
禮部自今制科隨進士貢舉著爲令在政府與宰相賈昌朝爭議育論辨
不已乃請曰臣所爭者職也顧力不勝請罷臣職仁宗顧直育乃復以爲

樞密副使會大旱昌朝罷去御史中丞高若訥用洪範言大臣喧爭爲不肅故兩不時若因並罷育以給事中知許州徙蔡州以保伍法檢制盜賊京中喧傳妖人干數聚確山詔遣中使以名捕者十人至則請以巡檢兵往索之育曰育在此雖不敏聚干人境內烏容不知此特鄉民用浮圖法相聚歛財爾一弓手可召致也乃館使者日與之飲密召十人械送闕下案驗皆無罪釋之告者抵法尋以資政殿學士知河南府徙陝州上書論楊儀獄云儀嘗爲三司判官近自御史臺移劾都亭驛械縛過市人人不測爲何等大獄及聞案具乃止請求常事豈養廉恥示敦厚之道哉遷禮部侍郎知永興軍召兼翰林侍讀學士以疾辭且進便郡仁宗語朝臣曰吳育剛正可用第嫉惡太過耳命知汝州遣使存問賜以名藥會疾不已又請居散地乃以集賢院學士判西京留守司御史臺舊例不領民事時張堯佐知河陽獄訟稽積民多詣育訴育書判紙尾堯佐畏恐因卽奉行復爲資政殿學士兼翰林侍讀學士知陝州進資政殿大學士召還判尚

書都省諫官劉元瑜誣奏育在河南嘗貸民出息錢久之除宣徽南院使
鄜延路經略安撫使判延州龐籍經略河東與夏人爭麟州築柵白草育
謂約不先定而亟城必生事乃移籍書並疏於朝不報未幾夏人果犯邊
殺驍將郭恩而太原將佐皆以罪去疾復作辭不任邊事求解宣徽使以
資政殿大學士尙書左丞知河中府徙河南河南人聞之皆歡呼迎于路
嘉祐三年卒贈吏部尙書諡正肅育初尹開封范仲淹在政府因事與忤
及仲淹安撫河東有奏請爲任事者沮育顧取可行者行之人服其公在
二府時父待問以列卿奉朝請時人榮之育言子班父前非所以示人以
法顧不敢以一人之私亂朝制願得罷去不聽育少力學得心疾後數發
曾侍宴疾作仁宗愕然晚喜作詩在西臺與宋庠追裴白故事酬唱至數
百篇有文集五十卷歐陽公稱其尤長於議論云

歐陽文忠文集東坡志林宋史隆平集東都事

畧河南

通志

充字冲卿育季弟寶元元年第進士調應天府穀熟主簿入爲國子監直

講兼吳王宮教授僚輩多與宗室狎充齒最少獨以嚴見憚嘗作宗室六箴以獻仁宗命繕寫徧賜皇族英宗在藩邸心重之書於坐右屏至和元年權判吏部南曹會歐陽修判流內銓以請改胡宗堯京官爲言者所譖出知同州充言修以忠直結陛下之知不宜用讒斥逐若以爲私臣願與修同貶修得復留而充改知太常禮院初張貴妃薨仁宗欲隆其禮迫謚溫成皇后且詔立忌日充爲博士與太祝鞠眞卿等力爭之及知院事詔禮院議溫成廟樂舞判寺王洙希旨遽令禮直官填印狀進內同僚不及知充與眞卿皆怒移開封府治禮直官罪知府蔡襄緩其事充獨持之不置溫成神主祔新廟以端明殿學士楊察攝太尉爲獻官殿中侍御史趙抃監祭而充監禮內出圭瓚以灌鬯充言於察曰禮親享太廟用圭瓚若有司攝事則用璋瓚今使有司祭溫成廟而用圭瓚是薄於太廟而厚於妃妾也其於聖德虧損非細請奏易之察有難色內臣視祭者已聞之密以奏帝旨改用璋瓚祭之明日抃劾襄不案治禮直官罪而禮直官日在

溫成葬所訴於內臣曰欲送某等於開封府者充與真卿也於是出充知
高郵軍嘉祐元年改開封府推官歷知陝州京西淮南河東三路轉運使
治平二年入覲英宗雅知充留權三司鹽鐵副使熙寧元年擢知制誥神
宗諭曰先帝知卿久矣尋命同御史中丞滕甫安撫河北使遺除同知諫
院充言士大夫親歿或藁殯數十年傷敗風化宜限期使葬詔著爲令尋
除右司郎中權三司使時河北陝西河東三路屯聚士馬邊費常苦不足
充請歲減江淮漕米二百萬石委發運使於東南六路變易輕貨二百萬
緡五年外漕米如舊所得無慮緡錢千萬轉致三路平糴備邊從之三年
神宗欲以充爲叅知政事而充子安持王安石壻也安石奏充與已有親
嫌乃除右諫議大夫樞密副使四年慶州軍亂神宗深以用兵爲憂充乘
閒言曰朝廷舉事每欲便民而州縣奉行之吏多不能體陛下意動成勞
擾臣謂救弊宜以漸急之或致生變充蓋陰諷新法之不便也神宗領之
五年知通遠軍王韶取洮州蕃酋木征遁去充建議以爲師屯暴露糧餉

閒關生民之勤由此未艾宜委詔招誘木征以城還之糜以官爵令自領所部永爲外臣不必留兵絕塞列置郡縣屈力費財時方詔詔築武勝軍充言廢不用八年除檢校太傅行工部侍郎進樞密院使尋兼羣牧制置使提舉刪修軍馬司編勅充因言熙河展置四年經界雖定然一切猶仰東州轉車挽運則人力不給置場和糴則猾民得以乘時要價其患皆在於未有土地之入臣以爲莫若令弓箭手做古助田法行之熙河四州無慮萬五千頃十分取一以爲公田大約中歲畝收一石則公田所得十五萬石水旱肥瘠三分除一可得十萬石其便有六官無營屯牛具廩祿之費一也借用眾力而民不勞二也大荒不收官無所損三也省轉輸四也平糴價使猾民不能持輕重之權五也減和糴之數得其錢以移他用六也詔如充議已而提點秦鳳路刑獄鄭民憲乞候稍稔推行事遂寢明年安石罷相充守前官加中書門下同平章事充雖與安石連姻而心不善其所爲在西府數爲神宗言安石政事非是及爲相欲變更新法之不便